

UNA STORIA SIMPATICA

Iera una volta, una piegora che ze andada in botega con el suo agnelin.

Mama piegora doveva far la spesa perché quel giorno gaveva de vegnir tuti i altri animai de la fatoria per pranzo. Iera invitadi propio tuti: le armente che gaveva sempre qualcosa de far e le ze masa ocupade con tuto el late che le ga de tirar fora per far andar vanti la produzion; le cavre che tra l'altro ze sempre in barufa con le armente per chi che fa el late più bon, ma tanto el suo formagio ze quel che va de più; le galine rompitoigne che le ga sempre qualcosa de criticar, lore che le ze le più grandi babaze de la fatoria perché le sparlaza de le oche come mate e le ga perfin butà fora de la caponera el galo; i cunigli che ghe secava ciamar perché ghe magna sempre tute le carote e infine i cavai che vol gaver ragion su tuto solo perché i ze i più grandi de la fatoria. Insoma, sta povera signora piegora gaveva masa de far e de comprar per accontentar tuti.

Finché la signora piegora pesava tute le carote per i cunigli, el suo agnelin coreva e andava indrioman su e zò per la botega.

Quando che la signora piegora se ga inacorto che el suo agnelin non iera più vicin de ela la ga ciapà paura e la ze corsa a cercarlo per la botega. In tuto sto ambaradan l'agnelin ga sbatù contro el caciador. In quel momento se ga palesà la signora piegora che non vedendo subito el caciador la se ga meso sgridar l'agnelin che intanto iera pien de pipiù.

- "Ma non ti ga un poco de creanza e de comprendogno ? Corer cusì per la botega?! Ma cosa non te go imparà propio niente? Domandighe subito scusa al signor!"

Finida la predica la signora piegora ze saltada de paura perché la se ga trovà vanti el caciador.

- "Signor caciador, per favor non el stagi farge niente al mio povero agnelin con quel sciopo che el ga là.

In quel momento el caciador ga vardà el muso de quel povero agnelin, che ancora un poco che tocava ligarlo de come el tremava per la paura, e con

sestin el ga dito: - “Signora piegora non la se stagi preocupar, mi son un caciador, ma un caciador vegano.”

La signora piegora iera un poco confusa, ma la podeva tirar un sospir de solievo perché el suo agnelin iera salvo del sciopo.

-” La devi saver, ga dito sempre el caciador, che son diventà vegano per farghe una promessa ai mii fioi, non magnar più nisun agnelin per Pasqua.”

La signora piegora iera contenta e sorpresa de sentir ste parole propio da la boca de un caciador.

-” Deso la me dagi quà, che ghe iuto portar sta spesa fino la fatoria.”

E de quel giorno quei tre i xe diventadi grandi amici, chi gavesi mai pensado!

Un caciador vegano, un agnelin e una piegora...roba de mati!